

Ata Faataitai 1: Roger—O le a se mea e mafai ona fesoasoani ia te au i taimi faigata? (Mataio 14:13–23)

TUSI LESONA SEMINARE O LE FEAGAIGA FOU

I le Mataio 14:1–12, ua tatou aoao ai e faapea sa vavaese le ulu o Ioane le Papatiso e Herota. Mafaufau i lagona na oo ia Iesu ina ua Ia logotala ua fasiotia Lana uo ma Lona tausoga.

Suesue le mea na faia e le Faaola i le Mataio 14:13–23, ma vaavaai ma faailoga faamaoniga o lenei mataupu faavae: **e mafai ona tatou mulimuli i le faataitai a Iesu Keriso e ala i le faaalua o le agaalofo ma le auauna atu i isi tusa lava pe o tatou feagai ma ni o tatou lava faigata.** Ia maitau o se “mea tuufua” (fuaiupu 13) o se nofoaga e nofo toatasi ai, ma “mea e ai” (fuaiupu 15) o lona uiga o “taumafa.”

- O a ni mea ua e maua i nei fuaiupu e lagolago ai lenei mataupu faavae?
- O le a le mea na faia e Iesu ina ua uma ona ia silafia ua fasiotia Ioane le Papatiso?
- O le a se auala e mafai ai ona fesoasoani le faataitai o le auauna atu le manatu faapito a le Alii i se tasi o puapuagatia?

Na aoao mai e Elder Bednar o le Korama a Aposetolo e Toasefululua, i auala e mafai ai ona tatou atinae uiga faa-Keriso:



Mo se faataitai, e faaalua uiga o se tagata i le mana e iloaitino ai le mafatiaga o isi tagata ae o loo tatou mafatia foi i tatou lava; i le tomai e iloa ai le matelaina o isi pe a tatou matelaina foi; ma le mana e aapa atu ai ma faasafua atu galuega alofa mo le tiga faaleagaga o isi pe a tatou i ai i le totonugalemu o o tatou lava faanoanoaga faaleagaga. O le mea lea, o uiga o tagata e faaalua i le vaavaai atu, liliu atu, ma le aapa atu i fafo atu ae o le tali masani o le tagata faalenatura o loo i totonu ia i tatou taitoatasi o le manatu o le tagata ia te ia lava ma ona manaoga faaloloto. . . .

. . . E moni, e mafai e i tatou o tagata soifua ona taumafai i le amiotonu e maua meaalofa faaleagaga e o faatasi ma le gafatia e aapa atu ai i fafo atu ma tali lelei atu i isi tagata o e o loo feagai ma le luitau po o le faigata tonu lea e sili ona tuusao ma faamalosi le fetuaga mai i o tatou luga.

E lē mafai ona tatou maua se na gafatia e ala i le na o le finafinai po o le naunautai patino. Ae o lenei, e ao ona tatou faalagolago i “galuega, ma le alofa mutimutivale, ma le alofa tunoa o le Mesia Paia” (2 Nifae 2:8). (David A. Bednar, sa sii mai i le Sara Jane Weaver, “Na Saunoa Elder Bednar ‘i Aga o Keriso’ i le Semina a Taitai Misiona i le 2019,” *Church News*, 9 Iulai, 2019)

A o e sauni e faasoa atu mea ua e aoaoina, mafaufau loloto i aafiaga ua oo ia te oe i le auauna atu ai i isi.

- Aisea e te manatu ai o auaunaga faa-Keriso e fesoasoani ia i tatou i taimi o o tatou lava faigata?